

L'angolo della Poesia

È SPARÌ ANCA LA CORT DAL PULVARA

A Milan a gh'è la piazza dal Dom, la via Manzoni, la via Torino e al vial Zara, invece chi a Oren a gh'è, o almeno a gh'era, la famosa mia cort dal Pulvara tucc a la cunusevan nèe, oh!, anca perchè a l'era la cort di patate dal patatee e a vignavan da ogni part a comprai: ogni ann a ritornavan indree dal patatee

ma la mia intenzion a l'è da fa a la mia cort ona certa ma real descrizion a l'era una cort da paes, ma cont person a la bona come a l'è solit l'Oreses a pensà che hin cortil a gh'era anadit, gain, puresit e nissugn tancugnava a gh'era ona quei contrarietà, ma subit a saa tornava a la completa normalità.

Ma ai temp indree a l'era abitada dai seguent person: Cristina Chilò e Carolina, Angiulò, Sandrin e Teresa ortolana ch'a vendeven la frutta e verdura nostrana a gh'a vurevan tanto ben ai bagai e ogni tant a gh'a regalavan rigulizia e anesit, a gh'era Luisin, Neta, Ancilla e Maria dal Vit, mia zia Milò, Carlin al paa da Chilò,

certament a poden noo mancà i Pulvara, dai mèe zii Lina e Elia, Maria e al soo Tugin, da la mia nonna Adelaide al nonno Richin, da mia mamm Barazzett a mèe paa Carlin, disem c'a ga saria anca da nominà i bagai, ma adess a stoo minga nanca chi a elencai però nèe, oh!, a podi minga tralassà ma a voraria cercà da pudèe un poo parlà e ricordà

che hin dal cortil per la grand devozion a gh'è sta ona benevole vocazion a parli da Don Silvano, on pret modell che tucc al tegnan propri come on fradell a voraria parlà on momentin per spiegà come ho passà i mèe ann chi a Oren disem c'è saa viveva mei e a l'era assee d'avè hin saccocia on poo da cinghei

dopotutt ho passà ona vita hin cà la cort lì, basta pensà c'è son nassuu lì però la mia intenzion a l'era da pudèe hin tutt i maner ritornà propi indree ma purtropp ho dovuù rifudà anca perchè a gh'è voreva on poo tropp danee sicura c'è mèe dispiasuu ciappà ona decision per lassà la paterna abitazion.

Comunque a voraria ancamò proseguì, anca per pudèe a tucc fa capii che anca mi al soo minga cosa gh'è saltà hin ment da ristrutturà l'ambient però, nèe!, a hin sta on poo baloss perchè all'interno hann sgiaccà giù tuscòs o almeno hann cercà da lassà suu poch o nigut per minga fa la figura dal cigut

per forza, a saa doveva sì cercà hin tutt i maner da pudèe on quicos ristrutturà come al mur da la facciada per fa rispettà lo stile d'on paes senza tropp pretes. Certament hann fa lì di bei appartamenti cont on cortil moderno e accoglient ma per mi a l'è stada ona desolazion e, quand a passi via a maa vegn al magon... oh!, anca perchè è sparì la caratteristica cort dal Pulvara da tucc tanto ammirada.